

新式 標點 新公文程式大全

國民政府頒布

六電文輯要

- 1 中央政治機關電文
- 2 地方政治機關電文
- 3 黨部電文
- 4 軍事機關電文
- 5 各公團電文

上海世界書局印行

新式標點
新公文程式大全

第六編 電文輯要

中央政治機關電文


【國民政府公電】

▲致直轄各機關總理誕辰舉行大規模紀念會應轉飭所屬一體遵照
電

國急。南京軍事委員會。外交部。財政部。交通部。司法部。大學院。監察部。最高法院。江蘇省政府。南京市
政府均鑒：

本月文日，爲總理誕生之辰，追念偉功，宜有盛典，首都爲全國觀瞻所繫，尤應舉行大規模之紀念會，除由中央黨部訓令全國各級黨部，本府訓令全國各機關，並分別領導舉行外，合亟電達遵照，並轉飭所屬，一體遵照，國民政府支印。

▲致各省軍政機關免除新年拜賀并飭所屬員司努力奉公電



3 2174 1740 5

新公文程式大全

MG
H/12.3
27

太原閻總司令。並轉山西省政府。各特別區政府。洛陽馮總司令。並轉河南、陝西、甘肅、新疆、各省政府。雲南、貴陽、成都、南寧、廣州、福州、杭州、長沙、武昌、南昌、安慶、南京、各省政府。各特別市政府。軍事委員會。並轉陸海空各軍將領。上海海軍楊總司令。並轉各將領。武昌程總指揮。白總指揮。海軍陳司令。並轉各將領。徐州何總指揮。鹿總司令。並轉各將領。均鑒。

大地春回，風光旖旎，舊習冠裳畢集，函電紛馳，飲屠蘇，作吉語，用占祥瑞，點綴新年，今者鞞鼓聲喧，昏霾待靖，各將士効命疆場，方且冒雪遄征，我同胞體念時艱，應共臥薪嘗膽，豈遑逸豫，以飾昇平，爲此令仰各機關，各部隊通飭所屬，免除拜賀，並剴切曉諭員司，努力奉公，協圖進步，亦昔賢憂樂與共之意也。國民政府沁印。

▲致各軍將領元旦特頒犒賚電

太原閻總司令。並轉各將領。暨全體將士。洛陽馮總司令。並轉各將領。暨全體將士。福州楊總司令。襄陽樊總司令。徐州何總指揮。漢口李總指揮。程總指揮。方總指揮。胡衛戍司令。楚有兵艦陳司令。南昌朱總指揮。安慶陳總指揮。上海白總指揮。各總指揮。各司令。各軍長。海陸空各將領。暨全體將士。均鑒。國運方興，泰運共躋，鼎新革故，又閱一年，我將士奠定江南，戡平河朔，風聲所播，備致庥祥，茲逢建

朔佳辰，復值立都紀念，山河壯麗，聽凱唱於千軍；日月光華，騰歡聲於八表。特頒犒賚，益勵精誠；允集大勳，用舒喁望。國民政府養印。

▲致中國合衆蠶桑改良會各代表嘉慰及時開幕電

上海法租界亞爾培路中國合衆蠶桑改良會國民政府各代表鑒：

慶雲初紀，一陽叶來復之祥；暖律驚飛，七政啓更新之運。貴會經綸海宇，衣被蒼生。咸議改絃，及時開幕。羣賢畢集，任重資深。所望同德一心，謀猷共濟。柳營挾纊，助北伐以成功；黍谷回春，欣南鍼之遍逮。恢宏靡既，嘉慰彌殷。國民政府支印。

▲致暹羅萬崙初貝國民黨支部嘉許擁護黨國電

中國國民黨暹羅萬崙初貝二支部林代表雲梯鑒：

蕭部長轉來刪代電，具見關心黨國，擁護三民主義熱誠，至堪嘉尚！本政府受本黨及全國民衆付託之重，職責所在，誓必廓清反動，努力前進，以求貫徹主張。海外僑胞，興亡與共，尙希本先總理革命精神，一致奮鬥，共促國民革命之成功。瞻仰雲天，易勝跂盼。國民政府印。

▲復廣州各團體經派軍隊進剿共逆電

國急。廣州總商會、學聯會並轉各團體公鑒：

各團體來電均悉。共產餘孽，荼毒羊城，劫掠焚殺，窮凶極惡。老弱轉于溝壑，廬舍付諸劫灰。翹望南天，痛憾何極！政府悉力北伐，未及先事防維，惡耗驚聞，彌深引疚。業經遣派軍隊，分途進剿，並查辦嫌疑諸犯，用伸國紀，以杜亂源。戡定有期，特電覆達。國民政府號印。

【中央各部電文】

▲外交部長伍朝樞就職通電

中央黨部、國民政府鈞鑒：蔣總司令、財政部古部長、交通部王部長、總政治部、海軍楊總司令，各總指揮、各軍長、師長、軍、師政治各部、黨代表、各省市政府、各省市黨部、各報館均鑒：

案奉國民政府令開：『特任伍朝樞爲外交部長。此令』等因。遵於五月十日在南京就職。當此外交嚴重之秋，受命於危難之際，才輕任重，深懼不勝。惟既承政府委託，同志敦促，不敢不勉爲其難。謹秉承總理遺訓，努力於不平等條約之廢除，以求中國之自由平等。深望邦人君子，暨各同志時錫南針，藉匡不逮。伍朝樞叩。文印。

▲外交部長黃郛致國電譚主席先行請示方略電

南京讀主席勳鑒：

庚電奉悉。外交任重，徵及輟材，翊贊宏猷，懼弗克勝。惟念中央會議諸同人煞費苦心，果有途徑之可循，又豈敢忘情於黨國。擬於下星期內入京，先行請示方略，藉資考慮，而定方針。特電佈悃，諸希亮察。黃郛叩齊印。

▲外交部長伍朝樞抗議日本出兵山東通電

中央黨部、中央執行委員、國民政府政治會議、各部長、總司令部、各省區黨部、各省政府政務委員會、各會團體、各報館均鑒：

日本出兵山東，破壞國際公法，妨害我國領土主權。業經本部致文日本田中外相，提出嚴重抗議。聲明設有意外事件發生，應由日本政府完全負責，並要求將已派出之軍隊，剋即撤退等語在案。仍希錫以南針，共策羣力，以爭勝利。特電奉達查照。伍朝樞印。

▲財政部次長錢永銘就職并代理部務通電

中央黨部、國民政府鈞鑒：蔣總司令、外交部伍部長、交通部王部長、總政治部、上海楊總司令、廣州古部長、各總指揮、各軍長、師長、各軍師黨代表、政治部、各省省政府、省黨部、各市政府、市黨部、各報館均

鑒：

案奉國民政府令開：『任命錢永銘爲財政部次長。又奉中央執行委員會政治會議函開：『代理財政部長古應芬未到任以前，所有部務，由次長錢永銘暫行代理。除咨政府外，函達查照』等因。遵於五月二十六日在南京就職。當此財竭民困之時，肩茲重任，覆餗堪虞。惟既承政府委託，同志敦促，不能不暫承其乏。謹當逐步整理，首先恢復財政系統，廓清積弊，減免苛捐，並遵總理遺訓，本裕厚民生之精神，爲財政革新之方針。乞邦人暨各同志錫以教言，用匡不逮。錢永銘叩沁。

▲財政部考察各省收支現狀及飭造預算表電

江蘇、浙江、安徽、福建、廣東、廣西、雲南、貴州、四川省務委員會、財政廳廳長，並轉各地鹽運使、鹽運副使、權運局局長、關監督、內地稅局局長、菸酒公賣局局長、印花稅處處長、沙田局總辦、捲菸特稅局局長、煤油特稅局局長及其他中央財政徵收官署各長官均鑒：

現值與師北伐，軍需浩繁，欲定財政整理方針，首在考察各省收支現狀。該省中央歲入歲出款目，共分幾項？月收月支各若干？地方歲入歲出款目，共分幾項？每項月收月支各若干？無論財政廳直轄，抑專署所管，統希分別查明電復，並將各款實數，分造預算計算等表，從速送部，以憑考核。至要。財政

部世印。

地方政治機關電文

【省政府公電】

▲江蘇省政府反對日本出兵山東通電

南京中央黨部、國民政府、蔣總司令鈞鑒：各省總司令、總指揮、總政治訓練部、各省黨部、各省政府、各軍師長、各政治部、各市長、各級黨部、各團體、各報館、暨全國同胞均鑒：

我國民革命軍創義粵省，奄有東南，吳、孫僅以身免，奉、魯已成弩末，肅清軍閥，蘇我民困，直搗黃龍，指顧可待，乃帝國主義之日本政府，不念同文同種之誼，橫肆鯨吞蠶食之謀，陽託保護日僑之名，陰行包庇民賊之實，我軍師行所至，維護外僑，不遺餘力，正義所在，中外同昭，而獨彼狼子野心，張其淫威，多方壓迫，阻我義師，撓我北伐，蹂躪我領土，蔑視我主權，不特世界之公理，不足戢其野心，而彼本國民衆之表示，亦不復當其一顧，是固我國全體民衆所忍無可忍，抑亦世界各國同聲憤慨者也！同人服務江蘇省政府，具有爲國自衛爲民請命之決心，當於昨日舉行第三次總理紀念週年大會提出議案，詢謀僉同，用特披瀝宣言，誓與帝國主義之日本政府始終對抗，務達撤兵之目的而後已。凡

我國人，此心此理，當無殊致，尙祈羣起努力，共圖自存。謹佈區區，臨電馳企。江蘇省政府暨各廳全體職員同叩馬印。

▲浙江省政府賀中央黨部各委員就職電

南京中央黨部常務委員暨執監委員會諸同志鈞鑒：

吾黨中興，羣賢在位，紀綱整飭，合陶冶於一鑪；主義昌明，廣尊親於九有。納民軌物，躋世泰和。引企新猷，敬伸賀悃。浙江省政府叩真印。

▲浙江省政府賀政治會議各委員就職電

南京中央政治會議各委員鈞鑒：

訓政伊始，望治方殷，諸公經緯萬端，彌綸九有，訐謗丕展，揚法治之精神；綱紀畢張，納民生於軌物。艱難宏濟，樂利覃敷。引企鴻猷，虔伸燕賀。浙江省政府叩真印。

▲浙江省政府賀軍委會及主席就職電

南京軍事委員會蔣主席暨各委員鈞鑒：

欣聞元老壯猷，戎樞綜領，銀刀練士，熊羆成山岳之軍；神筆運籌，壁壘壯風雲之氣。誓刑白馬，飲至

黃龍翹首鷹揚，傾心燕賀。浙江省政府叩真印。

▲浙江省政府賀國民政府各委員暨主席就職電

南京國民政府譚主席、常務委員會鈞鑒：

國運更新，中樞有主，羣賢在位，煥列宿於奎垣；百度重光，登斯民於衽席。昇平有象，法治可躋。翹首鈞衡，傾心箭訟。浙江省政府叩真印。

▲江蘇省政府賀蔣總司令復職電

南京國民革命軍總司令蔣總司令勛鑒：

頃奉國民政府祕書處函送鈞座繼續執行職權通電，展誦之餘，既仰鈞座之進退較然，復慶黨國之軍令有託。從茲北伐完成有日，共亂殲滅可期。黨國前途，實深利賴。蘇省忝隸畿輔，夙承威德，聞命之餘，尤深忭舞。肅此電賀，伏祈垂鑒。江蘇省政府主席鈕永建、委員張壽鏞、陳世璋、陳和銑、何玉書、茅祖權、高魯、何民魂、張乃燕、劉雲昭、葉楚傖叩。效印。

▲江蘇省政府致財政部請撤消漁稅電

國民政府財政部勛鑒：

據溧陽商民協會魚業會徵電稱：「江浙徵收漁稅，魚商不堪其苦，請明令撤銷，以安生業」等情，相應轉電貴部，請煩核辦飭遵，並希見復爲荷，江蘇省政府文。

▲浙江省政府致各縣長催報解房租電

各縣長鑒：

現准財政部電開：『報解房租，原定竣事期限，早已超過，江蘇對於此事，行將辦完，尙祈從速催收，早爲結束』等因。查各縣徵收房租濟餉捐，迭經本政府一再嚴催，加緊催收，掃數報解，乃該縣迄今齊未依限解清，實屬有意延宕，合亟電催，電到，仰即迅速征齊掃解，以便結束，毋再遲延干咎，切切！省

政府

▲浙政府復杭江省州總商會酌加捐率希倡率勸導電

杭州總商會覽：

敬日代電悉，查捐稅定率，本以值百抽五爲標準，照近來貨價計算，比從前原定捐率，本應加增數倍，現僅酌加五成，係本政府體念商情，特予從輕，該商會領袖羣商，熱忱素著，本政府夙所嘉賴，現值北伐尙未完成，軍餉萬分吃緊，務希倡率勸導，匡扶大局，實深厚望，所請應毋庸議，仰即轉知遵照，省

政府東印。

【省政府各廳公電】

▲江蘇民政廳致各縣長飭查報雨量電

各縣縣長覽：

本年入夏以來，天氣亢晴，雨澤稀少，田疇龜坼，秧苗難蒔。現在省垣已於元寒兩日得有透雨，各縣已否一律同霑，秧苗能否及時栽插，仰迅查明電復爲要。民政廳長鈕刪印。

▲浙江財政廳長呈總司令財政部長報告財政困難電

前奉部電，軍需緊急，儘陰歷年底籌足一百萬解部，其采職司財政，自應負責遵籌。惟庫空如洗，別無方法，祇好仍從借貸着手，當經日夜奔走，向省內外各商界，以感情作用，竭力籌借，勉強湊一百萬之數，已分四批由上海中國銀行匯解鈞部。際此年關逼近，舊債未還，又借新債，困難達於極點。且從前財委會向寧紹借款契約，捲烟局不肯按月撥還，照約履行，致職廳信用喪失，故此大借款，尤感困難。現在年關雖過，此後開春淡月，金庫收入寥寥，本省政費，毫無着落，民間亦悉索敝賦，實再無從搜括。來日大難，有不勝終夜徬徨之感，理合將困難之情，據實上陳，伏乞鑒核。財政廳長陳其采叩。

黨部電文

【中央黨部公電】

▲中央黨部監察委員會通電護黨救國

汪主席並轉全體同志鑒：

本黨半載以來，革命工作之發展，一日千里。長江既全部肅清，帝國主義所盤據的最大營壘之上海，亦告克復。凡此基本之發展，足證民衆熱望本黨之殷切，與本黨同志此後工作之艱鉅。不幸當此時期，表面成功之迅速，與內部重心之崩弛，適成正比。黨員工作，感指導之無力；內外要政，受無形之停滯。黨的整個意思，無由顯明表達；黨的機關權力，莫能適當行使。內之百萬職員，準備奮鬥而不知聽命之何從；外之受治於黨之民衆，對本黨之中心失寄，漸次增加其惶惑。推原其故，不能不謂武漢聯席會議以來種種措施爲造成此局面之主因。

本會爲中央監察機關，當此重要時機，爲顧全革命利益與鞏固黨基起見，未便放棄遄鐸之職責。爰集會議，詳加討論，僉認以爲武漢最近之動作，實有極危險之傾向。茲特酌舉其錯誤之點，俾知事實所在，不容誣妄。

查武漢中央執行委員與國民政府委員聯席會議，係由到漢委員自由召集，據徐謙報告：係爲「適合革命利益，應付革命時機，代表中央權力之必要組織。」其爲臨時機關可知。彼時中央黨部近在南昌，理應提交追認，乃不唯不經此項手續，且於中央已有令改政治會議武漢分會，且令停止職權之後，仍復繼續開會，以中央執行委員及國民政府委員，而置中央之機關命令於不顧，將何以昭示中央威信於全黨。聯席會議既無適法根據，其由此產生之一切決議案之有無效力，更不問可知。此其不合者一也。於中央已有明令停止聯會開會之後，復開擴大聯席會議，決定召集中央執行委員會第三次會議，根據上述，其仍爲毫無根據之自由召集可知。查主席及常務委員，爲第二次全體會議所產生，躬負重託，非至合法召集之第三次會議以後，不能解除職責。今武漢之第三次會議，既未經常務委員會之提議及同意，即常務委員之列席者，亦僅寥寥數人，而竟毅然不顧，宣佈開會，中央執行委員會爲代表大會未開時之最高權力機關，又適當本黨北伐軍蘇皖戰爭最吃緊之時候，竟以若干委員之自由意志，出以如此草率浪漫之態度而開會，此其不合者二也。

至於開會以後之行動，凡足以破壞革命利益，惹起黨務糾紛者，尤爲更僕難數。條而舉之有如下列：開會後劈頭第一事，即爲「統一黨的指導機關案。」夫本黨爲革命之政黨，指導機關有無效率，

以革命勢力能否在此指導機關下發展爲斷。第二次全體會議產生之常務委員會成於北伐出師以前，在此機關指導之下，北伐軍事以最困窘之給養，任最艱鉅之工作於極短促之歲月，克極頑強之二大軍閥，苟非指導得宜，得民衆之信仰與武裝同志之奮勇効命，何以臻此。若非反對本黨革命效力之發展，別有肺腸，何至於前方最吃緊之時，破壞卓著功績之指導機關。此可痛心者一也。當該會議開會武漢之時，正中東兩軍武裝同志在蘇皖肉搏疆場之日，政府卽不憫念其憂勞，亦何忍加以妨害，槍械子彈，爲北伐之命派，乃武漢聯席會議三電粵兵工廠，令其停工，拆移機器於漢陽，此其壟斷軍械，阻礙北伐之陰謀，已顯然畢露。乃猶不止此，當國民革命軍力攻蘇浙時，連電請濟子彈，漢方均置若罔聞，是實欲置國民革命軍於死地，乃快厥心。此可痛心者二也。國民革命軍受命北伐，義不容得一隅以自封。故自克鄂，贛以後，並分道並進，規復東南。而該會議中乃發軍事進行過急之辭，以爲詆譏。甚至原定調赴東南之兵，亦爲該會議所遮阻，逗遛上游，及淞滬底定，漢口黨報，竟皇然誣國民革命軍爲匪軍。該會豈無耳目，何竟絕不糾正。其掣肘於事前，誣毀於事後，用心積慮，昭然若揭。此可痛心者三也。國民革命軍之有政治部，原以統一黨的訓練，使整個的軍隊成總理之信徒，爲三民主義而作戰。自爲少數搗亂分子把持以後，純粹之三民主義者，被排斥無餘。甚至周納罪名，拘幽

滿獄，是實欲中國國民黨之黨員絕跡於國民革命軍中，而高呼提高黨權者，至此又不發一言。此可痛心者四也。農工政策，本爲總理所貽留，指導農工，組織農工，爲國民黨黨員之天職，乃自共產黨分子加入以後，對國民黨員之爲農工運動者，盡量排斥，偶有組織，動遭摧殘。中央對此，不聞有糾正之事，而對於農會工會之幼稚行爲，則又視爲驕子，絕無指導制裁之權能。此可痛心者五也。廣東省市黨部及江西省黨部之組織，並無不合法之點，而兩省黨部之選舉辦法，係經中央政治會議第六次臨時會議通過，此次列席武漢會議之各同志中，有多人皆曾親自列席於該會議。一切經過，均所親見親聞。今忽謂違背總章，勒令改選，不知究係違背總章之何章何節？各級黨部均爲指導本黨同志革命工作之機關，今以在合法情形下產出之兩個重要之省分黨部，在本黨革命勢力發展之環境下，而橫被取消，是本黨各級黨部，在軍閥勢力下，猶能冒死奮鬥而存在；而在本黨黨內轉成毫無保障之機關。一切黨部，均將寒心。下級屬部，莫知秉承，妨礙黨務之進展，實開重大之惡例。此可痛心者六也。特別黨部，原爲應付特別情形，以求革命勢力能迅速發展之組織，且已定有條例。武漢會議，不從修改條例入手，竟決定除軍隊及產業工人外，一律取消。且限定特別黨部，不得有同樣選舉第三次代表大會之代表之權。是不僅破壞本黨之組織，亦啓不平等的歧視之端，而妨黨務之進行。此可

痛心者七也。欲革命工作之完成，必須令各個黨員於負責努力中有所保障。今乃毫無正當理由，僅憑若干私人之愛憎，即可橫加處分。如因贛案而開除為黨努力同志之黨籍，令熱心者不敢負責，忠梗者人人自危，是為黨員無保障；又如因一執行委員「彭澤民」之提議，不具確實證據，不經審查手續，立談之際，而可停止中央執行委員「蕭佛成」之職權，中央執行委員為代表大會所選出，如此摧殘，於法何據？是中央執行委員亦無保障；又在該會議開會之武漢地面，凡為權力者所不懌之人，雖為黨中任重要職務之同志，亦不免於任意被捕，任意拘留，該會議及政府絲毫不加以制止，是則自命為中央所在地之武漢一般的人權，亦毫無保障。殘忍慘刻，演成恐怖，此可痛心者八也。黨報為宣傳本黨革命主義之機樞，亦即黨治下一般民衆視聽之所寄託。乃漢口民國日報一月以來之所揭載，大書深刻，莫非動搖革命基礎，墜壞本黨中心人物信仰之紀錄。此湖南省黨部之通電中，有蔣同志密令李宗仁同志監視中央執行委員等，毫無根據之譏言，影響所及，不獨毀壞革命軍人之令譽，且置中央執行委員之神聖名詞於何等地位。又如吳玉章同志，以負責之委員，主席湖北省黨部而發表極端惡意之演說，甚至有「軍費佔一千三百萬，……但是我們的武裝同志還是饑寒交迫……究不知他如何支配？」等語。此等意在中傷之籠統誣蔑，雖敵人之反宣傳，亦何以加茲。而竟

公然宣傳於會場，復大登特登於黨報。若非蔣同志深得軍隊信仰，試問此等言論散佈軍中，將令前方發生如何影響？吳同志既不知檢點如此，而中央宣傳部對於黨報，竟任令登載而不加管理，有意癡聾乎？溺斃職守乎？此可痛心者九也。武漢會議既無適法根據，其由此產出之中央機關，近來所發表之命令，尤多不顧黨國利益。如江西省政府成立未久，正在努力辦公，以贛省貧瘠之區，遭去歲兵燹之慘，休養勞來，方資壁畫，而武漢竟下解散之令，馴至忠貞同志不敢負責，千萬人民惶惑無主。當此全功未竟之時，唯省政府為最能負責實際責任，以普樂利於人民。贛省如此，何能望各省政府安心負責。基礎政治，顛覆是虞。人民徯蘇之望，何由實現。此可痛心者十也。又本黨為負責建國之唯一革命的政黨，亦為領導國內一切革命勢力統一指揮之黨，其旨趣已見於歷屆之決議案及宣言。所謂以黨治國之精神，即為本黨對世界、對中國民族毅然負起一切責任之表示。今觀於武漢會議中所決定採用之統一革命勢力案，竟有共同擔負政治責任問題之一條。內稱應由共產黨派負責，同志加入國民政府及省政府。此種謬誤之決議，大有背於本黨以黨治國之精神，極端毀滅本黨組織之根本趣旨；減少羣衆對於本黨之堅固信仰；乃於代表大會閉會期間，竟以若干中央委員非合法的會議中，為此重大之決定。亡黨之責，誰當負之？總理所辛苦建設之本黨，不謂一部份之執行委員竟

輕輕斷送之而不稍惜。此其尤可痛心者十一也。

如上所言：皆爲武漢會議中所加於本黨之根本之創傷。致使革命勢力發皇張大之本黨，有遍體創痍之觀。長此以往，不獨北伐困難，而本黨百萬黨員，與朝夕以求中國的自由平等之民衆，亦將何所寄託？險象如此，詎能再安緘默。爰痛切陳詞，望我全體同志，念黨國之危機，凜喪亡之無日，被髮纓冠，共圖匡濟。扶危定傾，端視此舉。披瀝奉陳，敬候明教。中國國民黨中央監察委員會委員鄧澤如、黃紹雄、吳稚暉、李石曾、蔡元培、古應芬、張靜江、陳果夫、青。

【省黨部公電】

▲浙江省黨部通電請肅清共黨

十萬急！沿途不得停留。南京蔣總司令、中央監察委員會鄧澤如、黃紹雄、吳稚暉、李石曾、蔡子民、古香琴、張靜江、陳果夫、諸委員均鑒：

青電謾黨發表，昭示同志，奉讀之餘，同深悲憤。武漢聯席會議絕無法律根據，不服中央命令，復非法擅自召集中央執行委員會於武漢，顯係跨黨叛黨份子陰圖操縱，密謀破壞。故於領導革命已著功績之常務委員會，則廢棄之；製造械彈爲北伐命脈，粵省兵工廠則停頓之；運彈調兵，橫加遏阻，出

師克敵，妄加詆毀；甚且革命軍隊，誤爲匪軍；總理信徒，斥爲叛黨，其壟斷政治部，包辦工農運動，摧殘粵贛二省黨部，抑制特別黨部，排擠忠實，誣蔑蔣總司令，解散贛省政府，種種倒行逆施之事，如尊電所舉，尤屬事實昭然，無可諱飾。揣跨黨分子，加入本黨之意，原欲藉寄生政策，取本黨而代之。中國共產黨第三次全國大會，關於國民運動及國民黨員議決案第六項云：「我們加入國民黨，但仍舊保存我們的組織；并須努力從各工人團體中之國民黨員，收真有覺悟的革命分子，漸漸擴大我們的組織，謹嚴我們的紀律，以立共產之基礎。」此欲利用本黨改造共產黨之證。又中國共產黨第二次全體大會，關於工會運動，與共產黨議案第八十條云：「共產黨人在國民黨所組織的工會裏面活動，又復任意引導工人脫離已成的工會。我們的戰術，是要在打倒勞力之工會裏面漸漸積成勢力，推倒國民黨，自己奪得領袖地位。」此爲陰謀推翻本黨之證。其推翻本黨之手段，一曰截斷本黨向農工方面之去路。共產黨第二次大會，關於國民運動及國民黨問題議案第七條云：「我們在國民黨中，須注意阻止國民黨在勞動運動上改良的傾向。」又對於此次省港罷工的政策問題云：「我們主張這次罷工，完全由我們來領袖，並且要由我們領袖到彼方面，就是不要國民黨來做這次運動的領袖。」又共產黨通告云：「縱使有時可利用國民黨來壓制反動派，不能不出於特派員名

義，以成一種外交政策，於必要時用之。」又云：「遇有特別事故發生，除報告農民部外，要時向龍煒報告，以便龍煒決定辦法，指揮在農民部工作同志去執行。」原文中所謂「龍煒」，即指共產黨農民委員會。其壟斷農工運動，不欲本黨添加之意，昭然若揭。又日造作左右中三派，以離間本黨之同志，一九二五年六月三十日共產黨在廣州地方大會，通過農民運動決議案，第七條有云：「自決定宣傳民黨中左右三派事後，農民已有相當的認識，此後應公開宣傳本校與民校之區別。」是一般民衆所以疑本黨同志間有種種歧誤者，皆跨黨分子之流言間之也。若輩加入本黨之動機，初則如此利用，現則推翻，故凡挑撥議案，皆不利於本黨。又十五年共產黨大會，有煽動中國造成恐慌議決案一件，用意尤爲險毒。比來各地騷動情形，皆足證明彼黨業已執行此項議決案。我黨北伐以來，時僅半載，東南已告肅清，西北亦將底定，彼跨黨分子虛本黨勢力發展，基礎鞏固，而寄生者尚在萌芽時期，勢不能去而代之，不得不時令民衆對本黨發生惡感，而使國民革命之功，虧於一篑。若不急圖挽救，則黨國危亡，可立而待。諸委員受本黨全體同志之付託，秉監察之職權，務祈將跨黨叛黨分子迅予肅清，勿使共產黨造成大恐怖之時局。本黨幸甚。浙江省黨部巧印。

▲河南省黨部通電擁護中央第四次全體會議

各報館均鑒：

竊查全國夙所渴望之中央第四次全體委員會，已如期完成。所有會議宣言及議決各案，俱備補偏救弊，對症下藥。糾正革命理論與方法，為本黨造一新生命，確定建設方針與步驟，為政治開一新局面。宏總理之遺教，樹黨國之根基，盡籌碩劃，苦心孤詣，璀璨隆重，輿論翕然。從此黨內統一，勢力鞏固，北伐大業，指日可就。本部同人暨全體黨員，誓竭至誠，絕對服從。深願我省各界同志同胞一致遵循，努力奮鬥。懲前毖後，共相策勉。俾中央議決各案早日實現，以完成本黨救國救民之使命，而達到政治民有民享之目的。中國國民幸甚。迫切陳詞，不盡欲言。臨電神馳，伏維垂察。河南省黨部叩巧。

▲**湖南省黨部改組委員會通電請一致反對張逆作霖與比國延長商約**

鑒：南京中國國民黨中央執行委員會、國民政府鈞鑒：各省軍政長官、各級黨部、各民衆團體、各報館公

中比之商約，今已滿期。去歲舉國力爭，唇焦筆禿，旋奉國民政府宣佈比約失効，民心為之稍定。北庭媚外性成，違反民意，因循不決，識者早慮其藉比約以相勾結，近接各方來電，愈稱張逆作霖，已商

准駐北京比國公使，以民國庚子賠款爲抵金，發行美金五百萬元公債，充作軍費，而以延長中比之商約五年爲交換條件。聞訊之下，爲之髮指。吾國貧弱，卽爲不平等條約所束縛。本黨頻年致力於國民革命，卽以廢除不平等條約爲目的。稍具人心，咸無異議。乃因抵抗革命，私借外債，不惜冒大不韙，圖復已失效之不平等條約。軍閥萬惡，一至於此！而吾黨同志，不急豺狼之除，方爲意氣之爭，致使軍閥得帝國主義者之接濟，以延長其殘喘；帝國主義者因軍閥之勾結，而擴大其侵略。在彼固不足惜，吾黨之自相戕賊，予敵人以可乘之機，事之痛心，寧有逾於此者。往者難追，來軫方遄，甚望吾黨忠實同志，犧牲私見，挽救大局。對於張逆所舉外債，當根據吾黨對外政策第六項，絕對否認。而於回復已失效之比約，尤當喚起民衆，一致反對。根本救濟之法，惟有從速團結，繼續北伐。軍閥既除，則帝國主義者自失其侵略之工具。失茲不圖，後悔無及。瀝泣陳詞，幸垂明鑒。湖南省黨部改組委員會叩。豔印。

▲福建省黨部籌備委員會電賀江蘇省政府委員就職

南京江蘇省政府鈕主席暨各委員勛鑒：

真電欣悉。諸公出膺省政，拯衛新都。從茲政治刷新，出斯民於水火；主義光大，奠黨國於乂安。翹企雲天，歡騰曷極。謹電馳賀，無任瞻依。福建省黨部籌備委員會馬叩印。

▲福建省黨部籌備處宣傳部通電爲新加坡華僑被害請與帝國主義者經濟絕交

南京蔣總司令、汪主席、張主席、何總指揮、白總指揮、李主任、新加坡黨部、各省黨部、省政府、各團體、上海民、海民國日報、申報、各報館均鑒：

英帝國主義者在我軍北伐吃緊時期，擅施毒計，搗亂後方，逞其砲艦，示威恫嚇。最近在新加坡當我華僑紀念總理逝世週之日，竟敢開砲轟擊，致死傷枕藉，血肉橫飛。嘆我華僑，死也何辜！上海、沙基、萬縣、漢口、九江之血跡未乾，而新加坡之慘劇又起，凡屬國人，能無眚裂，望各地同胞本敵愾之心，伸同仇之志，驅逐英艦，實行經濟絕交，以慰死者之魂，而戢帝國主義者之兇焰。黨國前途，實利賴之。福建省黨部籌備處宣傳部印。

【市黨部公電】

▲南京特別市市黨部通電反對日本出兵津濟

南京中央黨部、國民政府、各報館、轉各級黨部、各團體公鑒：

奉魯軍閥，自滬寧潰敗，已不成軍。忽值跨黨分子搗亂後方，乃乘我撲滅赤餘之餘，不暇北進，得跳

梁浦口，橫行江北。近日我軍分路渡江，奉魯軍閥，望風奔潰，我軍追奔逐北，雷電轟掃，津浦鐵路，運河沿岸，已成風捲殘雲之勢。軍威所向，關外震恐，張逆喪膽，北京，濟南指日可下，河北民衆，方慶來蘇。乃日本帝國主義者，爲保護其所攫特殊權利計，借保護日僑之名，達反民意，公冒不韙，紛調陸軍，出兵天津，爲其走狗張作霖，張宗昌謀支持於萬一，以襲往年妨礙郭松齡軍事之故智，企圖阻遏國民革命軍勢力北進之發展。是而可忍，何以爲國。敵部對於日本出兵天津，誓死反對，謹領導南京民衆，以爲國民革命軍之後盾。望我同胞，一致興起，努力打倒口說親善之東方日本帝國主義，國庶有豸。中國國民黨南京市黨部叩。

▲南京特別市市黨部執行委員會通電聲討破壞我國關稅自主之野

心家

各報館轉南京中央黨部、國民政府、各省市縣黨部、各團體公鑒：

厘金爲國稅政，關稅不能自主，爲國際之污點。病國困商，擾亂和平，胥此厲階。本黨總理燭見及此，痛國權之喪失，傷民生之凋敝，以取消不平等條約，收回海關，裁撤釐金，定爲政綱，昭示來茲。徒以積重難返，未克實現。近者國民政府建都南京，本不妥協之精神，承總理之遺志，內除秕政，外爭國權，

毅然決然，定九月一日裁廢厘金，關稅自主，百年積習，國際深污，摧陷廓清，渙汗天下，凡此嘉舉，豈惟中華民族解放之福，抑亦世界經濟復甦，永保東亞和平之兆，自非別懷野心，甘作和平障礙者，無論中外士商，莫不延頸企踵，樂觀厥成。近聞有一二國際野心家，別具肺腸，藏包禍心，用其縱橫排合之手段，協以謀成，務使關稅自主，不得實現，以遏滅我自由平等一線之生機，而繼續圖其經濟侵略，武力恐嚇之好夢。凡我國民，罔不切齒。本會承總理遺囑，中央指導，聞此惡耗，不勝憤慨，謹領南京百萬民衆，一致爲政府外交後盾，敢有懷抱帝國主義，企圖破壞我關稅自主者，吾黨健兒，誓以熱血灑之。中國國民黨南京特別市執行委員會叩陽。

▲南京特別市市黨部改組委員會通電開始辦公

南京中央執行委員會、國民政府、蔣總司令、上海各報館，轉各級黨部公鑒：

本月二十二日奉中央執行委員會常務委員會函開：『派吳倚滄、靳鶴聲、左景烈、洪軌、甘家驊爲南京市黨部改組委員，接管該黨部一切事宜，並籌備改組』等因。奉此，委員等以黨部爲革命民衆之最高指導機關，不可一日停頓，經於本月二十四日在南京薛家巷西暨南學校舊址開始辦公。查共產黨員加入本黨，曾聲明服從本黨主義，努力國民革命，乃跨黨分子居心叵測，甘爲鮑羅廷走狗，

陽假本黨之名，陰謀盜竊之實。平時對於本黨忠實同志，極力排斥壓迫，近更在武漢盜竊中央黨權，欺騙工農，擾亂後方，種種叛跡，擢髮難數。幸中央監察員檢舉于前，全體同志響應於後，各省叛黨份子，次地肅清。委員等秉承上級黨部之指導，審率全市黨員，肅清叛黨禍國之共產分子，努力打倒帝國主義及軍閥，剷除貪官污吏土豪劣紳及一切反革命派，以期三民主義之實現。謹此電陳，中國國民黨南京市黨部改組委員會叩。

▲無錫清黨委員會縣黨部市黨部通電對日本經濟絕交

南京中央黨部國民政府蔣總司令轉各級黨部各團體各報館公鑒：

我軍北伐，進展神速，統一全國，指顧可待。乃日本帝國主義者，懼其走狗勢力消滅，保其侵略工具，悍然出兵山東，違反公法，蔑視公理，藉口保護僑民，希圖阻撓義師，破壞我國民革命。凡我同胞，莫不髮指。爲今之計，惟有由政府嚴重抗議，限期撤兵。全國人民對日經濟絕交，爲外交後盾。黨國前途，實利賴之。無錫清黨委員會、縣黨部、市黨部同叩。

▲全椒縣黨部改組委員會通電擁護關稅自主

各報館轉各公團各法團暨全國民衆均鑒：

頃悉我國政府決於九月一日實行裁厘加稅，且宣佈關稅自主，敝會歡忭之餘，痛思我國自滿人失政，國勢飄搖，列強以不平等條約相逼而來，非特謂勢力範圍，利益均沾，且更執我海關之權，要皆帝國主義者自佈其陰謀，直以我國爲其共管之無主地也。民元以後，軍閥恣睢，政客惡化，復興帝國主義者相結納，使關稅自主之權，操於外人手者垂數十年。國內工商業，以此不能發展，國民經濟，以此日益沉淪。是我國之形神俱亡，智愚共見。而此一般之軍閥政客，非特黃粱不醒，一意以外人之刀俎，殘民衆如魚肉，猶復加重厘金，剝削民膏，以資中飽。因此國民經濟所受之重重束縛，罄竹難書。今我國政府應時勢之需要，痛民生之凋敝，採毅然決然之手段，而挽狂瀾於既倒，實行裁厘及宣布關稅自主，以甦民困而復主權，我國之存亡關鍵，在此一舉。凡我民衆，應如何迸瀝熱血，同聲擁護，惟既裁厘金，收入頓減，故同時加稅以資補救。須知所加之稅，限於嗜好奢侈之品，則猶寓禁於徵，功利兼收，德恩罔極，此尤希我全國同胞所當共諒者也。中國國民黨全椒縣黨部改組委員會叩文。

▲漳浦縣黨部籌備委員會通電平潭縣二二八慘案請向日本嚴重交涉

萬急！各級黨部、國民政府、各民衆團體、各報館鈞鑒：

准平潭縣二二八慘案公民大會暨日快郵代電稱：「二月二十七夜大霧濛濛，日本錦江丸輪船駛至大富港南帶柳澳，爲霧所迷，以致觸礁沉沒。至二十八日上午，突有日本兵艦三艘趕來，當時漁民或在附近捕魚，或在岸上眺望，詎料該兵艦三艘，同時開放排槍及機關槍，向海面及岸邊射擊，約三十分鐘之久，可憐無辜漁民，或中彈立沉海中，或擊斃船上，而岸邊陳屍纍纍，更覺慘無人道。現已查得中彈即死者三十餘人，傷者百餘，尚有死傷人數，續查再報。該兵艦隨於下午三時發兵五六十名登陸，荷槍實彈，沿村挨戶搜查，將村民鷄鴨豕洋搜劫一空。此日本兵艦在潭慘殺民衆及搜劫鄉村之不堪卒述者也。」等情。本會同人披閱之餘，悲憤填胸。夫日帝國主義者恃砲艦之堅銳，無故開槍射擊我同胞，死傷至百餘人之多，其心目中尙有所謂中華民國者在乎？本會願偕漳浦三十萬民衆爲政府後盾，懇即向日本帝國主義在華所有特權，及一切不平條約，一律取消，一面要求懲辦兇首，賠償損失，並擔保以後不再發生同樣慘劇。萬望各地同胞，一致奮起，誓死力爭，以維國體。漳縣黨部籌備委員會叩真。

【區黨部公電】

▲上海特別市第二區區黨部電中央黨部請速選派幹員整理上海黨

務

南京中央黨部常務委員會鈞鑒：

竊自四次會議告成，黨務政治，俱見整頓，從此一改舊觀，重入革新大道，黨國前途，胥以有賴。但各地黨部，自中央命令停止活動以來，進退頗感兩難，以致苟延時日，一切工作，無從進展。而以上海黨部停頓時期爲尤長。前者捧讀命令，派員整理各地黨務，企首雲霓，時盼佳音。奈何時隔多日，未獲實現。竊維黨部爲領導民衆之要樞，實現主義之中心，豈容一日停頓。爲此懇祈從速選派幹員，整理上海黨務，復過去之光榮，開未來之新紀。臨電迫切，不勝待命之至。上海特別市第二區黨部敬叩。

▲上海特別市第八區區黨部電中央執監委員擁護定都南京

中央執行監察委員會鈞鑒：

南京爲全國中心，形勢雄壯，交通便捷。先總理指定爲首都，遺囑又令營葬於此，其所以念念不忘者，蓋有深意存焉。今中央政府，當機立斷，毅然遷移，上遵先總理之意旨，下順民意商情，從此首都奠定，主持得人，全國政治有刷新之望。護黨運動，得以澈底解決。消息傳來，全體同志，一致歡騰，誓合全國民衆羣起擁護，始終不渝。特此電賀，伏維垂鑒。中國國民黨上海市第八區區黨部常務會員張樞

剛登全體黨員叩。

【區分部公電】

▲上海特別市第三區第十分部電蔣總司令國民政府中央執行委員會請掃除北方殘餘軍閥

南京蔣總司令并轉國民政府中央執行委員會均鑒：

自國民革命軍底定長江，誓師北伐，吾國民政府順應國民公意，遷都南京，行見新猷展布，繼續討賊，奠定國基，即在此舉，而中央執行委員會諸君，適於此時會集寧垣，決定黨國設施方針，肅清黨孽，以慰薄海所望。我蔣總司令爲吾黨忠實同志，際此國民革命尚未成功，尤望海內同志，一致擁護蔣總司令，及忠實武裝同志，掃除殘餘北方軍閥，以竟先總理未竟之志。同志等誓效前驅，特電申賀，維垂察焉。上海特別市第三區黨部第十分部全體黨員大會叩。

▲上海特別市第五區四分部通電日本進兵山東請一致抗爭

全國同胞公鑒：

此次日本帝國主義者，乘我國民革命軍節節勝利之際，膽敢逞其侵略之野心，無故進兵山東，輔

助奉魯軍閥，以增長我國內亂，侵略國權，莫此爲甚。當今存亡危急之秋，尙希全國同胞，羣策羣力，一致抗爭，以保主權，而重國體。臨楮迫切，不勝企盼之至。

軍事機關電文

【軍事委員會公電】

▲軍事委員會通電各報館爲懲辦十四軍軍長賴世璜并另委接充以

整軍紀

上海各報館均鑒：

查第十四軍長賴世璜，屢次作戰，畏縮不前，潛居後方，逍遙事外。此次我軍殲滅江南逆軍，令該軍長率部渡江，乘勝進擊，乃復遷延時日，逗留不進。經本會再三嚴令催促，僅以少數部隊開到泰州，靖江，從事敷衍。所頒發該軍餉精，從中尅扣，以飽私囊。致令全軍士卒，不得一飽。倘不予以嚴懲，將何以整飭軍紀，維繫軍心。於黨國前途，殊多妨礙。業經本會電令第一路總指揮何應欽，於本月十四日下午九時將該軍長在滬拿獲，押解淞滬衛戍司令部聽候本會核辦。所有第十四軍軍長職務，委該軍參謀長劉士毅代理。該軍第二師師長謝傑，調充本會參議。該師師長遺缺，委劉士毅接充。惟查該軍

全體官佐士卒，自加入國民革命以來，均屬深明大義，服從紀律，且能勇敢善戰，殺敵爭先，其擁護黨國之功，本會素所深悉。此次懲辦該軍長，實屬本會職責所在，不忍優容姑息，致貽後患。該軍全體官佐士兵，自當團結精神，繼續奮鬥，以報黨國。除分令並任命外，合行過電知照。軍事委員會銑。

【總司令部公電】

▲蔣總司令通電體念士兵苦況

各報館均鑒；

我軍出征以來，轉戰數千里，歷時九閱月，士卒勞苦，寧復忍耐。向者官兵薪餉，拆成發給毫洋，因粵省踴躍一隅，財源有限，市面復流通輔幣，原屬不得已之舉。擬俟長江肅清，爲士兵改良生活，徒以大功未竣，軍需浩繁，財政困難，無殊往日，環境所迫，因循以迄於今。本總司令念士卒飢疲，往往徘徊終夜，良以兵士所入無幾，再經折耗，何以贍其室家；內顧未遑，何以馳驅黨國，易地而處，人同此心。茲者江流上下，盡隸版圖，稅收所入，應較寬裕。且市面通用大洋，洋毫程度倍落。曩昔各地農工，應時勢之需要，紛紛組織團體，增加勞值。我數十萬武裝同志，豈忍獨令向隅，致受經濟壓迫的苦痛。着自四月一日起，所有官兵薪餉，一律按十成改發大洋，藉示本總司令體念同胞之意。合亟電令遵行，並仰飭

屬一體遵照辦理。總司令蔣。

▲蔣總司令通電擁護中央

上海白總司令轉各軍均鑒：

國民政府在完成總理遺志，接受民衆請求，執行中央政治會議議決案三個重大意義之下，已於本日開始在南京辦公。中正爲主義而作戰，欣願中樞，端賴擁護。頃上國民政府電云：『南京國民政府鈞鑒：中正上承中樞之指揮，下賴將士之忠勇，轉戰七省，幸定東南。乃因黨內糾紛擴大，牽及國民革命之前途，憂慮徬徨，莫知所適。念此效命疆場之部伍，無異瞻依後母之孤兒，若再無人顧惜，與以正確統一之指導，必致坐墮革命之大業，永負總理遺言。今幸全體監察委員會舉發叛徒陰謀，清源正本，中央政治會議，繼述總理遺志，奠定南京。國民政府開始辦公之日，卽國民革命重建中樞之時。中正欣喜之極，不禁涕零。嗣後當竭吾誠意，恭聽命令，率此部曲，擁護中央，掃除一切反革命之叛徒，共竟實現三民主義之初志。國民革命軍總司令蔣中正叩。』並希同袍同志，一德一心，確立統一指揮之機關，完成國民革命之遺戒。革命存亡，決非俄頃。披肝瀝膽，毋負平生。國民革命軍總司令蔣中正巧印。

馮總司令通電爲追悼陣亡將士徵文

萬急！南京中央黨部、國民政府、各省政府、各省黨部、各機關、各級政府、各團體、各總司令、各路總指揮、各師長、各旅團營長、各報館、各學校、豫、陝、甘、各行政長、各縣長均鑒：

溯自我國民軍聯軍全體武裝同志，歷年討伐奉、魯軍閥，如北倉、南口、洛、鄭、蘭、封、歸德諸役，間關萬餘里，身經數百戰，類皆爭先恐後，陷陣衝鋒，只以服膺主義，努力工作，暗鳴則山嶽爲摧，叱咤則風雲陡變，或葬身狼窟，未歸先軫之元；或勇捋虎鬚，致斷杲卿之舌。最近徐州一役，將士傷亡尤多，而各地民衆，贊助義師，捐軀斷脰，灘血沙場者，尤屬不可勝紀。君子將變爲沙蟲，小人亦化爲猿鶴。雖革命之全功未竟，而效忠之大義炳然。在當日沉舟破釜，早存必死之心；爲同胞剪紙招魂，聊示報功之典。茲定於本年二月一號，在開封省垣爲國民軍聯軍革命陣亡將士及因革命死難民衆，開追悼大會。並在追悼會場，建築一革命紀念館，以表哀忱，而垂永久。諸公功高衛國，誼篤同袍，追念忠勛，諒深悼痛。如蒙惠賜輓聯、鴻文，或其他紀念物品，即請寄至河南省政府副官處查收，以便陳列。嗚呼！關山月冷，猶聞殺伐之聲；邊塞雲寒，誰埋忠烈之骨。倘誄詞之遙寄，知存歿之均感。一字寵褒，等銘竹以紀功；九原有知，定結草以殲敵。靈爽式憑，全功克竟。謹電馳告，敬祈鑒察。馮玉祥暨全體官佐同叩。

▲馮總司令電謝國民政府特頒犒賞

國民政府鈞鑒：

天運復轉，星紀一週，際黨國之鼎盛，值大地之春回。我政府除舊布新，建國立極，既慰全國民衆之望，復念前線戰士之勞。養電欣奉，犒賞特頒，三軍挾纊，益奮勵以無前；四遠騰歡，悉同心而協力。謹率全體將士，恭鳴謝忱，并賀崇禧、馮玉祥叩宥印。

▲閻總司令電國民政府歡迎蔣總司令統轄北伐全軍

南京國民政府鈞鑒：

恭讀皓電，頒布戰鬥序列，敬悉蔣總司令被命統轄北伐全軍，簡畀得人，全軍歡躍。除敬率所部，聽候指揮外，謹肅電聞，伏乞垂鑒。閻錫山叩號亥印。

▲閻總司令電國民政府遵令轉知各路將士誓掃胡塵

國民政府賜鑒：

接奉歌電，遵即轉知各路將士，恭聽綸音，歡聲雷動。益振同仇之氣，彌興挾纊之思，誓掃胡塵，致身黨國。錫山恭膺重寄，深愧鉛刀，尙祈軒戎北指，乘風而逐豭，尤自當會師薊門，冒雪以擒元濟。江天在

望，企禱良殷。閩錫山魚印。

▲海軍楊總司令通電福州軍界請戮力同心振救邦家

銜略閩省苦於軍閥之暴虐久矣。十餘年來，軍政民政，凌亂已極。閩人慘遭壓迫，憔悴呻吟，呼籲無地。我國革命軍義師所指，如朝日沃雪。軍閥奔逃，使閩人出水火而登衽席。樹莊近奉中央委任，並令成立正式福建省政府。自維德薄能鮮，難勝負荷之重，而各委員中，或同爲袍澤，或素屬知交，巖疆州邑，畛域無分。本屬連茹彙拔之心，或未盡忠信香草之雅。比者閩邦人士，對於兼任廳長各委員，無指摘之詞，未昭信任之意。業經樹莊特向中央表示衆意，敬謹退避賢路。乃辭書甫上，而諄諭諉頌，懷以時局之艱危，責以黨國之重寄，仔肩擔荷，頻卸末由。查省政府委員已任十三人，滄海遺珠，似猶有憾。樹莊抵閩後，并當於黨國先進，當地名材，隨時羅致，請命中央，同參政治。至外間不察，或以此次省政府組織，實有偏於海軍包攬之嫌。不知福建將來政局，當趨於黨治之規模，斷非海軍一部分所能把持操縱。樹莊雖愚，亦知現在革命尚未成功，欲躋福建於真正黨治之域，須賴羣策羣力，以斬於三民主義之實現。非可如從前之惡軍閥，專恃地盤主義，以一省土地，爲其囊中壟斷之私物也。且閩省各邑人民，歷年罹受兵禍，比戶逃亡，轉徙溝壑，室嗟杼柚之空，野有飢寒之痛。丁茲生死存亡，閭不

容髮之秋，誓當戮力同心，拯救邦家，匡扶急難，萬不容橫參私見，貽害大局，致遭衆棄之嚴。樹莊耿耿寸心，天日可鑒，征途待發，謹掬丹忱，敬祈鑒察，無任主臣楊樹莊箇。

▲國民革命總司令部何參謀長通電就職

國限即到！南京中央黨部、國民政府、軍事委員會、蔣主席鈞鑒：國民政府各部部長，開封馮總司令、太原閻總司令、上海楊總司令，各總指揮，各省政府，各軍長，各師長，各級黨部，各報館均鑒：

奉國民革命軍總司令蔣元電開：『委何應欽爲國民革命軍總司令部參謀長』等因。竊夙有肺傷，頻年戎馬，既鮮治療，督師徐淮，更受寒溼，邇來肺病大作，難堪重任，擬稍事休養，再行圖報黨國，惟思革命尙待完成，黨員責有未盡，益以蔣總司令及各方責望，更覺義不容辭，特於本日就職，尙祈賜以南針，俾有遵循，毋任感禱。何應欽叩養印。

【各總指揮部公電】

▲何總指揮等通電救國要點五端

國南京中央黨部、國民政府、軍事委員會鈞鑒：上海蔣總司令、開封馮總司令、太原閻總司令、南京局送李總指揮任潮、李總指揮德鄰、白總指揮健生、朱總指揮益之、漢口程總指揮頌雲，各軍長，各師長，

各省黨部政府上海各報館并轉全國各報館均鑒：

徐淮雖克，逆餓猶張，晉豫有苦戰之師，民衆多流離之苦，黨政糾紛，遷延不決，共信失墜，國亡是虞。應欽等認爲目前救國之要點，厥有五端：自共黨搗亂，同志間離，現在補救之策，維有恢復中央。凡我同志，應以全力促開中央全體會議，會議一開，則此後中央委員所有意見，須正式提案，服從大多數之主張。其他黨員若有意見，則須提供各該級黨部呈請中央採擇，無論任何黨員，不能違反中央決議；亦不能超出中央議決範圍之外，自由行動。庶幾本黨黨權，得以確立。否則人一是非，橫決堪虞。稍有錯誤，武裝同志，固易成爲軍閥，非武裝同志，亦易流爲政客。黨如王冠，徒有其名。此希望各同志兢兢自勵，犧牲小己，速謀團結，以鞏固中央者一也。奉魯軍閥，苟延殘喘，日暮窮途，甘心賣國，慶父不除，國難靡已。北伐大計，急待完成。凡屬國民革命軍，應無分省域，除酌留一部維持省防，鎮壓反動外，其餘宜悉調赴前方，參加北伐，務令地盤觀念，根本破除，民膏民脂，不養惰卒。此希望各武裝同志，繼續總理遺志，完成北伐者二也。軍事指揮，貴在統一，稍有常識，類能言之。奉張媚外，蒂固根深，山西之軍，久苦血戰，若非圍集全軍，在同一命令之下，協合作，勝負之形，誰能逆觀。蔣總司令東山再起，總領師干，前敵將士，雲霓望切。此希望吾黨同志一致敦促，統一軍事，以剷除軍閥者三也。訓政開始，萬民

拭目，民財各政，亟宜刷新。若不幸而使貪官污吏，當道塞途，前敵將士，斷炊時虞，徵收之官，營私未已，民苦聚斂，國庫仍空。一旦信仰失墜，補救甚難。此希望各級政府，注意整飭，造成廉潔，以孚民望者四也。共產黨謀危國民革命，欲以我四萬萬黃炎神明之胃，供其犧牲。七見圖窮，凶殘畢露，非根本肅清，無以救國。此希望吾黨同志團結于三民主義之下，撲滅共亂，務求澈底，以建設自由平等之新中國者五也。凡茲所陳，卑無高見，惟心所謂危，難安緘默。切盼吾黨先覺，全體同志，念前敵將士之苦痛，民衆望治之殷拳，一致主張，早奠國本。墨與神馳，無任翹企。何應欽、賀耀組、劉峙、顧祝同、夏斗寅、曹萬順、張克瑤、陳煒、李明揚、衛立煌、杜起雲、張貞、蔣鼎文、徐庭瑤、徐思宗、黃國樑、陳繼承、胡宗南、谷正倫、毛炳文、楊永清、張森、萬耀煌、鄧振銓、余仲麒、李德明、趙觀濤、袁家聲、岳相如、王金韶、文鴻恩等叩號印。

▲石總指揮通電反對北方軍閥借用比國庚款發行公債

南京國民政府、各省政府、各總司令、各總指揮、各軍長、各級黨部、各級政治處、各社會團體，均鑒：

伏誦國民政府威電，對於軍閥借用比國庚款，發行公債，特向比使警告，並聲罪致討等因。繹誦之下，悲憤莫名。我革命同志，以熱血頭顱爭來之中華民國，軍閥時欲斷送於帝國主義者之手，禍國殃民，莫此爲甚。敬亭謹率西北數十萬武裝同志，誓死不承認此非法之公債，尙望全國同胞，一致聲討。

臨電憤激，無任翹企。石敬亭叩漾印。

▲方總指揮電國府謝頒犒賞

國民政府鈞鑒：

養電奉悉，履端肇始，寵賚遙頒，猥以鶩駘，濫膺懋賜，仰德意之殷拳，撫私衷而慚感，惟有恪遵鈞命，益勵精誠，藉竟革命之功，而副鈞座之望。謹率部曲，恭伸謝忱。特電肅復，伏維垂鑒。職方振武叩。感印。

▲國民革命軍第六路周總指揮通電在貴陽就職

革急！南京中央黨部、國民政府執行委員會、蔣總司令鈞鑒：各路總指揮、各軍長、各省省黨部、省政府、各級黨部、各師旅長、各政治部、各機關、各法團、各報館均鑒：

案奉蔣總司令任命狀開：『任命周西成爲國民革命軍第六路總指揮』等因。遵於六月一號，在貴陽正式敬謹就職。竊念共黨肆毒，影響全球，此害一日不除，革命事業即一日不能發展。千里之謬，爭在毫釐。西成前於五月初間，得川、桂轉到蔣總司令電令，當即立刻督令所部，直出湘西，職奉中央，誓清暴黨。並於五月陽日，通電申討在案。惟西成自念智識庸陋，才略粗淺，區區愚衷，惟知竭誠擁護我國民黨、國民政府。蔣總司令，以冀國是從此大定，革命早日成功。尙乞時錫教言，俾資遵守，不勝盼

勝之至再查西成前者發出討共動員作戰各計劃書因電碼錯誤之故曾將第六路總指揮誤作第二路總指揮茲特隨電詳明更正祈乞鑒察爲幸國民革命軍第六路總指揮周西成叩冬印。

【各司令部公電】

▲浙江戒嚴司令部周司令電復何總指揮周參謀長來浙募兵已電飭各縣協助辦理

揚州何總指揮助鑒：

帷密電敬悉。二十一師周參謀長來浙募兵已電飭各縣協助辦理。謹覆。周鳳岐叩冬印。

▲浙江戒嚴司令部電各縣縣長拿辦私擅招兵

各縣縣長覽：

頃奉總司令蔣篠電內開：『浙省如無總司令命令擅自招兵者應即拿辦。希飭地方官一體知照。』等因。合亟通電遵照。除警備師及警備團係奉總司令核准外如有私擅招兵情事應即會警營辦具報察奪。戒嚴司令部號印。

▲淞滬戒嚴副司令電國民政府陳述黨國二要點

南京國民政府委員諸公鈞鑒：

頃悉政府遷甯，神京聿奠，諸公就職，新政載敷，將使我莊嚴燦爛之中華，揚溢天聲，挽回世運。其爲欣幸，曷可言宣。顧百度待興，仔肩重大，提綱挈領，是賴諸公。鳳岐猥以輕庸，佐防淞滬，關懷時局，薄有微衷，謹伸片曝之誠，藉作芻蕘之獻。自人心浮動，共產突興，如火如荼，莫可遏抑，而究其實際，於三民主義固漠不相關，卽其產精神亦難以符合。剷除障礙，人同此心，繼往開來，亦當計及。是宜就先總理學說之精萃，如三民主義、建國大綱、建國方略等，採納精言，著爲憲典，通令全黨，一體遵行。則旣固黨綱，更堅黨志，黨員凝定，事乃有成。此對於昌明黨義，亟宜進行者一也。肘腋之患，防範蒸難，物腐蟲生，理數如是。此次肅清黨部，深合羣情，護黨之誠，端賴同志，披荆斬棘，以啓山林，曲突徙薪，具徵智慮。然懲前毖後，何以杜絕僞黨員之混入，何以促進良分子之增添，凡此圖謀，實關大局。近來懲辦土豪劣紳之事，黨部於此，每每藉端攻擊，徒快私仇，法理人情，毫不置問。昭昭往蹟，致憤良多。揆厥由來，要亦分子欠純，構成禍患，欲圖補救，當從根本進行。以鳳岐與諸同志討論之結果，以爲際此刷新時期，宜先由中央黨部，推派資望深重者，分赴各省及特別市，指導黨務，組織分子健全之臨時省黨部，及臨時特別市黨部，然後再由各省黨部遴選忠實練達之黨員，分赴各縣市，指導黨務，組織分子健全之

縣市各臨時黨部。區黨部亦依此組成。似此順序推行，則黨員既有統系，而黨組自易嚴明。正本清源，計無過此。但爲造就人才計，更須廣設政治訓練所，以培植新進之青年。庶幾治新舊於一爐，匯江河於大海，將來成績，必可煥然。此刷新黨務，亟宜進行者二也。民國肇造，十有餘年，甲仆乙興，莫能相向。所以然者，要由全國軍權，未能統一，尾大不掉，古今同悲。現在革命事功，尙在中道，斷不容毀冠裂裳，自肇分崩。蔣總司令勞苦功高，萬流仰鏡，乃少數叛黨，挑撥中傷，行同鬼域，道高魔至，言之痛心。似宜各本天良，竭誠擁護，俾得早平大亂，載竟膚功。黨國前途，定多利賴。此統一軍權，亟宜實行者三也。以上所述各點，均本黨目前切要之圖，次第推行，迫難容緩。是否有當，敬候公裁。至於政制之如何確定，財政之如何清理，生產之如何獎進，吏治之如何刷新，外交之如何運用，想諸公明達，鑒之熟矣。黨國新猷，佇看露布，馨香禱祝，定拜元勛。迫切陳詞，伏維垂照。第二十六軍軍長兼淞滬戒嚴司令周鳳岐叩。漾印。

【各軍部公電】

▲國民革命軍十二軍軍長任應岐等通電願率健兒追隨北伐

南京國民政府。軍事委員會。中央黨部。各省各級黨部。鄭州馮總司令。漢口唐總司令。太原閻總司令。

各省各總指揮、各軍長、各省政府、各機關、各團體、上海民國日報、申報、新聞報、轉各報館均鑒：

頃奉南京國民政府秘書處簡電，欣悉各部部長、軍事委員會委員、暨國民政府秘書處副官長、同時榮任，次第就職。行見北伐目的貫徹，革命事業完成，應岐忝長軍符，豫邊遠戍痛反側之危吠，憤胡逆之鷹隼，拔劍悲歌，枕戈以待，當茲良好時機，惟有率數萬健兒，本十餘載奔走革命精神，努力奮鬥，以追隨諸同志，冀於最短期間，直搗幽燕，會師遼瀋，上慰總理未竟之志，下抒民衆望治之殷，斯則應岐所日夜默禱者也。區區愚忱，謹電奉聞。尙祈垂察是幸。國民革命軍第十二軍軍長任應岐、黨代表李戡底、率全軍將士仝叩、微印。

▲國民革命軍第十四軍第二師師長兼代軍長劉士毅通電在無錫宣誓就職

杭州周軍長、各省政府、各公團、各報館、勛鑒：

案奉軍事委員會寒酉電令開：「着劉士毅接充第十四軍第二師長，暫行兼代第十四軍軍長」等因。奉此。遵於本月皓日在無錫宣誓就職。謹當服從長官命令，實行三民主義，殲除軍閥餘孽，肅清共產妖氛，努力奮鬥，盡忠黨國。惟是士毅才識庸陋，時虞隕越，尙乞各袍澤、各同志、隨時指導，以匡不

逮，無任盼禱。國民革命軍第十四軍第二師師長兼代十四軍軍長劉士毅叩。皓印。

▲國民革命軍二十六軍軍長周鳳岐通電辭去軍長及浙省政府主席

軍事廳長各職

南京、杭州、福州、武昌、安慶、鄭州，各省政府各總司令，各路總指揮，各軍長，各師長，暨各報館均鑒：

鳳岐猥以輟材，從事革命，時艱責重，匡救無能。此次因病辭去本兼各職，實係綿力難勝，非敢高蹈。荷蒙中央俯予照准，深感矜全。業將第二十六軍軍長暨浙江省政府主席，軍事廳長各職務，先後分別移交新任接收。從此得卸仔肩，藉資休養。風前退鷁，難期同軼之心；浪後頽魚，彌切深淵之想。惟千鈞之負雖釋，而匹夫之責未忘。滄海可枯，初衷不改。愛國之願，敢後他人。謹布區區，伏維照察。周鳳岐叩。眞印。

▲國民革命軍第四十軍政治部通電反對日本出兵山東

南京中央黨部、國民政府、蔣總司令、吳、陳、劉總政治部主任、賀軍長、鈞鑒：各省市黨部、各省政府、各師旅團長，各團體，各報館，鈞鑒：

日本田中內閣藉甯案爲口實，出兵山東，驚耗傳來，殊深髮指。頃讀總政治部東電，詞嚴義正，薄海

同仇。慨自我北伐軍節節勝利，日本帝國主義者，見其惟一工具之奉魯軍閥，已屆崩潰之期，乃不惜冒舉國之大不韙，假保護日僑爲名，實行以武力干涉我國內政，往年郭松齡討奉之役，功敗垂成，前事不忘，殷鑒未遠，事機迫切，稍縱即逝，尙望我國人一致反對，誓死抗拒，以保主權，而雪國恥。臨電神馳，貯候明教。第四十軍政治部主任李柏琴江印。

▲國民革命軍獨立第四師政治部通電擁護定都南京

上海、南京、蔣總司令、汪主席、張主席、何總指揮、白總指揮、陳政治部主任、李總參謀長、程軍長、魯軍長、民國日報、南昌朱主席、各軍師長、各政治部、各省黨部、各報館、鈞鑒：

我軍現已克復長江，旋將北渡黃河，直搗幽燕，革命成功，爲期不遠。軍政已次第結束，而訓政必須衆才。擇定首都，實爲要圖。金陵爲長江要區，北制豫、魯，南控湘、鄂，交通便利，人文薈萃，奠都於此，適得其宜。總理在日，早已計及，值茲救平蘇、浙，肅清金陵之際，務盼全國民衆，秉承總理之遺志，一致主張定都於斯。敬促國民政府全體委員，從速赴甯，共籌國是，黨國前途，實利賴之。國民革命軍第四獨立師政治部叩皓。

各公團電文

【農界公電】

▲青浦縣農民協會籌備處電江蘇省政府請制止十四區各村農民協會

會秘密集會

萬急！南京江蘇省政府均鑒：

竊查職屬第十四區（觀音堂）各村農民協會，組織糾察隊，每晚秘密集會，阻止會員於冬至前繳租。當經職處飭令解散其糾察隊，停止其工作，電請江蘇省黨部省農民協會籌備委員會迅示辦法在案。乃近聞仍有秘密集會，濫發宣言，行動詭秘，刻正在嚴密審查中。方今各縣共黨活動，該區應如何處理制止？伏祈鑒核示遵。臨電不勝迫切待命之至。青浦縣農民協會籌備處常務委員馬良驥叩。

▲無錫縣農民電江蘇省政府請制止漁局勒索

抄送南京國民政府委員會、財政部、江蘇省政府委員會、江蘇民政廳鈞鑒：

查漁業事務局，征稅範圍，以凡屬江湖海水產品物等魚類為限。農民等在私有糧產池蕩所養副業魚類，與專在江湖河海公共水道漁取水產品物者截然不同。江浙漁業事務局第三區無錫縣

稽征所，誤引條文，勒索稅項，病民擾農，誓不承認。務懇糾正制止，解除農民痛苦。無任哀籲待命之至。
無錫縣開原及揚名等鄉私家養魚農民蔣伯榮、吳祖道、榮梅春、袁生大、邱金甫等三百餘戶全叩。印。

【工界公電】

▲上海工統會通電請對日本出兵山東一致抗爭

本會因日本出兵山東，致日本內閣總理田中一電。文曰：『日本內閣總理閣下：人無智愚，族無強弱，捍陵禦侮，含生是同。貴國近日出兵，竟及東魯，魯固我土，疆界是嚴。貿貿師徒，與遣何義，充其口實，止於衛僑，而僑固相安，且衛猶在我，健呻庸擾，意更何居？不思敵國國人鑒舊策新，恢宏黨治，革命機動，功日千里。雖頑強當梗，殘醜待清，然有我廉潔之國民政府，與忠勇之將領，內安外戢，澄清是期。貴國誼屬輔車，應樂觀成，庖不相需，鼎安容問。假謂各緣利害，不事相謀，則全球之強，豈惟貴國。昔俾士麥嘗以鐵血精神相其雄主，積數十載之精練宏蓄，濟之以威廉二世之雄誇狠鷙，橫發大難，而今安若哉！況乎貴國頻年未盡康樂，佳兵不祥，願閣下深長思也。本會同人，許身黨國，負領導全上海八十萬工友之重責，一月以來，三舉運動，羣衆勢力，足堪考慮。比聞貴國驟興無名之師，羣情激昂，環待後

令。而同時全國抗議貴國出兵，函電紛至沓來，本會對此嚴重之時局，一方領率八十萬覺悟的工友，作抗爭之準備；一方聯合舉國革命的民衆，爲強固之團結，而依貴國事實之明示，下最後之決定。特掬至誠，馳告閣下，實圖利之。上海工會組織統一委員會印世」等語。特電奉達，乞全國共伸義憤，一致抗爭，不勝企幸。上海工會組織委員會世。

▲燕湖總工會通電擁護政府遷甯

南京中央黨部、國民政府、暨蔣總司令鈞鑒：

義旗高舉，舉師北伐，乘風破浪，底定金陵。當軍事進展之時，正值中央黨部、國民政府同時遷甯，正式成立。從茲首都奠定，鞏固上樞，四方風從，萬流仰鏡。將來肅清餘孽，掃穴犁庭，統一中原，光大黨國，指顧間耳。遇伯代表勞工，謹掬虔忱，敬祝萬歲。燕湖總工會馬遇伯叩。

▲上海土布職工會第一分會通電擁護關稅自主

各報館轉全國各機關、各團體公鑒：

我國財源命脈，被外人掣肘者，八十餘年。以致民生凋敝，經濟枯竭。茲幸我國政府毅然下關稅自主之令，於九月一日實行。敝會邀聽之餘，曷勝慶幸。蓋我國工業，從此可以振起；國家經濟，從此不

爲外人剝削。用請全國同胞，齊聲擁護作政府之後盾，俾貫徹其政策。黨國以之。上海土布職工會第一分會啓。

【商界公電】

▲各省商會聯合會通電反對日本出兵山東

各省黨部、省政府、各機關、各公司、各報館均鑒：

本年三月間，國民軍底定東南，渡江北伐，日本抱帝國主義之野心，甘冒世界不韙，出兵山東，已爲全國國人所切齒。乃閱時未久，乘國軍攻克徐州之際，忽傳有第二次出兵之舉，名爲保護僑民，陰實阻撓義師，用意所在，昭然若揭。是可忍，孰不可忍！本會各省代表，正值在滬開會，突聞此訊，驚駭莫名。經於本月二十三日提出大會討論，一致通過，爲堅決反對之表示。如彼方始終不顧公理，吾全國商人，爲保衛國權起見，自當本其決心，亟起對付。爲此通電奉達，務乞一致聯合主張，共同表示奮鬥精神，藉以戢彼野心，擁護國權，祇候明教，不勝企盼！各省商會聯合會叩。

▲各省商會聯合會電各省埠商會請勸募粵災急賑

各省埠總商會，並轉各縣、各鎮商會均鑒：

准華洋義振會函開：「此次廣州及海陸豐五華等縣，忽遭燒殺搶掠大慘劫，流毒所至，市井爲墟，無數災黎，正在水深火熱，茲經本埠廣肇公所、潮州會館、粵僑商業聯合會、商請敝處組救濟粵災徵募大會，以期紓此巨難。日昨開籌備會，當經議及現各埠商會正在貴總會開聯合會，想到席諸公，聞斯慘劇，披髮纓冠，定亦不讓當仁，擬懇羣策羣力，賜予贊助，振務前途，實利賴之。」等因。當經提出十二月二十三日大會討論，僉以此次共黨在廣州海陸豐等處暴發，肆意焚燒殺戮，凡所經過之處，精華殆盡，值此歲暮，災民流離失所，慘不忍言，自應廣爲徵募，藉拯飢溺。經議決由本會通電各商會，分投勸募，以資通力合作。集成鉅數，匯往災區，除分電外，合亟電達查照。務即同時發起募捐，並設法先行籌集，源源匯寄，俾資急振，曷勝感禱。所有捐款，請即匯交上海總商會內本會總事務所收轉，合併奉達。各省商會聯合會叩歌。

▲上海總商會通電條陳政治綱要

南京中央黨部、國民政府、財政部、宋部長、江蘇省政府、上海市政府鈞鑒：暨各團體各報館均鑒：

恭讀中央四次全會宣言，宏猷遠謨，經緯萬端，秉承總理遺教，確立黨治方針，下風遡聽，薄海騰歡，惟自民國建立以還，連年戰爭，干戈擾攘，兵燹所經，農廢未耜，工輟繩墨，商絕貨賄，流離載道，生產蕩

然，社會經濟，已瀕於山窮水盡之域，及今而言建設，自宜首重國民經濟生活，惟建設之道，不在改弦易轍，取革命方式，要在維護培植，令其逐漸恢復。政府提倡於上，小民專力於下，則社會生產，自能漸有轉機。昔衛文公大布之衣，大帛之冠，務財訓農，通商惠工，期年之間，成效大著，謂宜遠法古人明訓，近遵總理遺教，根據歷史民情，導揚民生主義，所有一切苛捐複稅名目，培克聚斂政策，概行廢除，舉凡含有共產理論，分化策略，煽惑階級運動，以破壞生產秩序爲目的者，明令禁止。庶幾經濟復活，國力充裕，爲獨立自強之始基，得實際正確之效果。敝會忝屬商業團體，思慮所及，敢貢一得，伏候採擇施行。上海總商會叩元。

▲上海總商會電南京中央全體會議請取消苛捐雜稅

南京中央全體會議蔣譚于主席並轉財政部宋部長鈞鑒：

我國民革命軍底定江淮，長驅魯境，掃蕩幽燕，指顧可期。值茲四次全會，黨權鞏固，下情喁喁，尤盼盛治。比以軍費浩繁，捐稅驟增，而一般失意政客，更復巧立名目，以爲進身自肥之圖。於是局所林立，重疊稽徵，培克聚斂，習爲風氣，呼籲無門，怨咨載道。敝會不避冒瀆，敢代商民請命，應請俯賜提議，將一切苛捐複稅，概行撤廢，並裁併駢枝徵收機關，嚴禁巧黠之徒，假借名目，獻媚嘗試，藉期予吾民休

養生息黨前途，曷勝利賴。迫切電陳，等候訓示。上海總商會叩。

▲上海總商會電國民政府各省省政府省黨部商人部請糾正撤銷商會議案

南京國民政府 各省省政府 省黨部商人部 鈞鑒：

近聞杭州漢口等處有提議撤銷商會之舉，敝會揆其情勢，諒因中央黨部商人部最近通令，有擬於全國第三次代表大會時提出請求撤銷全國商會之議案，以致各處未加考慮，有此行動。查本年十月十四日，中央黨部商人部第一次部務會議，其涉及商業團體組織者有云：「本黨主張是全民革命，並無階級的分限。現在我們繼續總理的遺志，為解除我全民族的痛苦，故須全國民衆一致起來努力革命。共產黨是主張階級鬭爭的，以工人為主，其他階級不過是輔助。故在黨部的組織，工有工人部，商稱商民部，農稱農民部，工有工會，農商稱協會，有這種區別，於全民革命中，謀全民利益，是有望礙的。」各等語。中央商人部既以工有工會，而農商另組協會，為違反全民革命之政綱。是商民協會之組織，在政綱上已無存在之餘地。乃中央商人部最近通令，竟有擬於全國第三次代表大會時提出請求撤銷全國商會，以商民協會為領導機關之議案。此項通令，非特與第一次部務會議原

案不符，且與全民革命之黨綱實有抵觸。敝會業向上海特別市黨部商人部述明異議，並擬定全國商會召集時，將此項問題列入，為充分之討論，以期於全國第三次代表大會時，盡情陳述。民衆行動，既須統一於黨國指導之下，則此項問題，在全國商人未有充分之意見發表，以及第三次全國代表大會尚無如何決定以前，自不得取任意之行動，致礙紀律。應請俯賜察核。對於民衆此項錯誤行動，隨時予以糾正，實為公便。上海總商會叩。

▲上海總商會電軍事委員會請令交通處無線電報續收商電

南京軍事委員會鑒：

無線電報自收商電以來，民咸稱便，近聞因故停收，無任惶惑。自鈞會主辦無線電以來，時僅一載，成績斐然，兼營商電，一以利便民衆通信，一以裕電台經費，事屬兩利。黨治下之新建設，此其嚆矢。刻近舊曆年關，商電更關重要，用代商民呼籲，懇請鈞會即日命令交通處續辦，以利商業，並盼賜復。上海總商會叩。

▲上海總商會電交通部請令滬甯鐵路賠償被竊運貨

本月十二日，接本會會員上海運輸同業公會函稱：「據鼎通瑞泰恆永泰隆等公司函稱：『於上

年十二月二十三日，裝二三號車運鎮江各貨一車，裝畢後，除照例由路局固封外，各公司爲慎重起見，復加洋鎖兩把。詎該車開至麥根路站，延擱三小時之久，由三十三次開出後，行經安亭站時，其車門被人撞開，計被竊去各貨，有十七件之多。（失單另開）又於十二月十九日，裝二四二號車運鎮江各貨一車，該車行經周涇港時，其門已開，計被竊去各貨五件。（失單另開）統計被竊去各貨二十二件，損失二千餘元之鉅。察驗該車門上有鎚水痕跡，足見被賊用鎚水開鎖無疑。似此屢被偷竊，賠累無窮，長此以往，損失何堪。除函陳路局請究外，爲此函請貴會轉請總商會，函陳交通部，迅電滬甯路局，照數賠償，以保客商血本，而免賠累。至深紉感。等因到會。敝會當召集會議，僉以麥根路至安亭一帶，時有偷竊客貨情事，一月數見，若不設法整頓，不獨客商視爲畏途，於路政運輸，亦兩有妨礙。經衆議決，除登報賞格，如有能將人賊並獲者，准提給二成獎金洋四百元，通風破獲者，獎洋二百元。並函請滬甯路局警務處，各地公安局等一體嚴緝，務獲究辦等因去後，乃事隔多日，迄未破獲。今據路局復函云：「被竊之貨，不允負責」等因。查該車裝畢後，既由鐵路固封，復由公司加鎖，不爲不慎重道地。開出後，路局派有車守押車等，沿途有護路警察，今一車內被竊去各貨十七件之多，且用鎚水開鎖，決非短時間所可爲，何以該車守等均不知耶？若照路局來函推諉，貨主負責，則轉運公

可亦不賠償，試問客商是否血本有關？若將來原車貨物於途中全行被竊，路局亦不負責耶？伏思貴會爲各業之樞紐，爲特函陳困苦情形，務請貴會軫念商艱，轉陳交通部，迅電滬甯路局照數賠償，以保客商血本等語。查鐵路代客運貨，既已徵收定額之運費，卽有保護安全之責任。茲據該會聲稱一車內被竊各貨，竟有十七件之多，是押車之車守以及護路之警察，均屬疎於防範，無可諱言。衡情論理，路局自應負相當責任。據函前情，理合電請鈞部鑒核，俯賜令知滬甯路局，准予照數賠償，以維客商成本，實爲公便。上海總商會叩文。

▲上海商民協會電中央全體會議暨財政部請廢除苛捐雜稅及節省

經徵費用

南京中央執行委員全體會議蔣、譚、于三主席，轉全體委員暨財政部宋部長鈞鑒：

竊以立國之要，首在民生。戎馬之後，培養宜亟。雖北伐尙未完成，餉糈難於籌畫，而竭澤何以能漁，去皮毛將焉傳。自國民政府奠都南京以後，未及一載，司農三易，對於本黨稅政計畫，以格於形勢，非特未能將苛細雜捐剷除淨盡，且有層出不窮之勢。一稅之收入幾何，而設局置長，宛然衙署，剝削倍克，怨騰市廛，徒損民生，無補國計。況一稅一局，一局數長，凡國家經徵之官，幾成私人酬庸之具。揆之

總理民生主義之綱領，實已南轅而北轍。當茲中央會議開幕之日，本會謹代表全滬商民，有所申請。對於一切苛細雜捐，無論舊有新設，應即一律撤廢。並請大會議決，定爲成案。嗣後如有巧立名目，跡近聚斂者，概行禁止。統一稅收機關，施行正當賦稅，節省經徵費用，裁減冗贅官長，庶幾國得其利，民受其惠。掬誠直陳，諸祈鑒察。上海特別市商民協會籌備處叩虞。

▲杭州商民協會電國民政府中央黨部蔣總司令條陳工商互惠請重訂雙方兼顧法規

竊維工商兩業，同係國家之命脈，即同受國家之保障。保障如得其平，則彼此調劑得宜，相維相繫，而實業之興起勃焉；保障一失其平，則彼此情感日惡，相傾相軋，而市廛之衰敗忽焉。時無古今，道無中外，未有不通商惠工，一視同仁，惟持畸輕畸重之政策，而可以收保富保庶之效果者。自我國民革命義軍興起以來，屬當戎馬倉皇，軍閥盤據，其時破壞開始，建設未遑，不得不聯合農工民衆，共起亡秦。無如多數工友知識幼稚，不知與商業民衆共立一條戰綫之上，惟知仇視資方，自相魚肉，挾其方張之氣，與起階級之鬥爭，而工人團體，又復領導不善，訓練無方，坐視大多數勞工之衆，起而與資本階級爲難，種種不平等條約，因之次第產生，強令資方承認，資方以強弱異形，衆寡殊勢，暫圖一時

之安，勉受城下之盟，名為妥協，實則壓迫；名為同意，實則強姦。由不平等條約訂立之結果，於是勞工代價，則突然倍增；工作時間，則一再減少。荒嬉曠廢，經理無開革之權限；疾病婚喪，資方負重大之義務。而且一暴十寒，停工之例假繁夥，層見迭出，遊資之賄貼難堪，稍不遂意，動以罷工停工相要挾。凡所以挾制資方，提高勞方者，無所不用其極。權利義務之不公平，更莫有甚於此者。當時資方陽雖勉從，陰實隱痛，經屬會苦口勸導，始得勉強維持市面。究之生產之限度銳減，支出之數量浩繁，較之平時一出入，相去霄壤。圖窮七見，虧耗必然，所以一至年終結賬，折本之店，十居八九，停歇之戶，觸目皆然。商業凋敝，至斯已極；商既不振，工亦隨之。據最近概括調查所得，因商務衰敗之結果，失業工人突增至數千人之多。若商業再無起色，失業者更有加無已，社會前途，可為寒心。此次中央第四次執監會議，繆委員斌有鑒於此，於過去民衆運動不良之害，痛切陳說，提議根本改善，懲前毖後，高瞻遠矚，洵救國之良謀，起病之藥石。海內同志，不乏賢達，當有起而應之者。伏祈政府詳察民隱，體恤商困，俯將上述情形，轉陳第四次執監會議，改良黨治之大綱，重訂工商之法規，總期雙方兼顧，無偏無倚，捐除苛刻之條，確立互惠之則，為商人謀營業之鞏固，即所以為工友謀生計之安全。輔車相依，休戚與共，庶商無失敗之家，工無失業之人，胥全國芸芸之衆，盡為安居樂業之民，豈惟工商之幸，抑亦黨

國之福，總理之靈，實式憑之，剴切陳詞，伏維垂鑒。杭州市商民協會籌備委員會常務委員孟祿久等叩庚。

▲上海華商烟廠聯合會電財政部請對菸稅修訂先與華商開誠接洽勿徒注重洋商

南京國民政府財政部長鈞鑒：

自去歲七月，紙烟統稅，值百抽五十頒行，華商爲尊崇政令，首先遵辦。洋商則始終反抗，自由運輸，馴致外煙充斥，稅局嗟然莫覩。政府稅收既縮，華商銷場復絀，爲叢驅雀，識者痛之。逮孫前部長蒞任，設菸酒處，即與洋商磋商徵稅，有值百抽二七五之規定。嗣格於領團梗阻，卒寢其議。華商被此影響，販賣觀望，營業又受重大打擊。他如租界強貼印花，內地復停商運，攤派庫券，預借稅款，一地數徵，留難不已。在此青天白日之下，華商一年以來，亦既創巨痛深甚矣。比悉報載財部與英、美重申二七五之前議，道路傳聞，成熟不遠。是華商生命，又懸於呼吸之間也。夫政府欲洋商就範，不惜遷就，以求增裕稅收起見，顧徒知便利洋商，而罔計全體華商痛苦，不先考慮，大錯鑄成。華商痛切剝膚，又豈能已於不言，以任犧牲停業耶。茲就二七五之規定論，華洋商同，表面固然，究其實際，出入甚重。假使實行，

華煙既繳重稅之存貨，暨所存多量之印花，政府能否償補損失，倘不追認，價格所關，何異造成船品專利。此應先討論者一、海關船品，估價與實價懸絕，如大英牌海關每箱只估九十兩，而市價二百元。華製則照值徵稅，不容短少。試問同一貨品，價格既殊，盈虧立判，何論競爭。此應討論者二、其他類似弗遑枚舉。敝會以為政府徒知注重洋商，輕視華廠。窺其恭順，遂便壓抑。揆諸情理，甚非賢明政府善理財者所宜出此。矧華廠納稅，負擔不為不巨。即江浙兩省計，年達千萬。以納稅鉅額之商人，曾無參預政治之權利，官商隔閡，糾紛遂多。政府匪特靳於獎掖，重魚肉之事實不平，甯有逾此。今敝會代表華商請命，敬懇政府關於菸稅修訂，無論對內對外，先與華商開誠接洽。敝會公推代表，討論求詳。華商身歷其境，痛癢較切，常備諮詢規畫，必能有裕稅源，以符民生主義。伏祈採擇，毋任屏營。迫切陳詞，敬候覆教。上海華商煙廠聯合會叩。

▲上海華商紗廠聯合會電中央政治會議暨國府財政部江蘇建設廳 請將本國棉花禁止出洋

南京分呈中央政治會議、國民政府、財政部、江蘇省政府建設廳鈞鑒：

本年印、美棉產，皆報歉收，國內棉花，本不敷厥用，而外棉輸入無望，華棉再不禁止出洋，華商紗廠，

勢惟停業。工人生計頓絕。社會治安堪虞。擬懇俯念紗廠一業。關係國計民生之重。俯准將本國棉花一律禁止輸出。實所公感。華商紗廠聯合會叩漾。

【教育界公電】

▲美國普渡大學中國學生會電蔣總司令懇即渡江北伐

蔣總司令鈞鑒：

滬甯各地相繼克復。大軍所至。無敵不摧。此固人心之所向。抑亦總司令指揮之功。竊念華北各省。猶在水深火熱之中。務懇即日渡江。指師北上。殲彼元兇。統一全國。敝會同人。無任馨香拜禱之至。美國普渡大學中國學生會叩賀東。

▲上海持志大學學生會電中央執監委員會慶賀奠定首都

南京中央執監委員會鈞鑒：

溯自義師抵滬。轉瞬底定。全蘇幸幸學子。方幸脫離軍閥之淫威。共隸青天白日黨幟之下。以享真正之民有。民治。民享。不意少數跨黨份子。倒施逆行。宣傳共產。使青年子弟深入迷途。供其犧牲。此種禍患。何異洪水猛獸。欣悉首都奠定。主持得人。從此清黨救國。時雨均霑。謹本熱忱。以申慶賀。持志大

學學生會叩。

▲上海教育同志會電中央執監委員會國民政府慶賀定都南京

中央執監委員會國民政府諸公鈞鑒：

南京爲歷史名都，江南重鎮，綰全國交通之樞紐，據長江鍾山之天險，外交軍事，便利實多。總理生前，早所屬意。今奠都於此，本基既固，建設裕如。電聞所播，萬衆騰歡，不獨北伐大功，指日可竣，而盤據武漢之一般亂黨，巢穴既已動搖，操縱失所，憑藉，妖氛孽障，不難一掃而空。謹掬熱忱，用申賀悃。上海教育同志會叩巧。

【各團體公電】

▲上海各團體電外交部爲日商壓迫潘義泰米號請向日當局提出警告

南京國民政府外交部鈞鑒：

滬商潘議泰米號潘守仁，於今年春，應滬西及新開商聯會之要求，向日商三井物產株式會社上海支部穀肥部，採辦安南、暹羅等洋米，以接濟國內民食。乃該日商不願信用，常有走樣缺磅情事。後

潘議泰因損失過鉅，一面向該日商提出交涉，一面停止出貨。該日商爲先發制人計，遂向上海租界臨時法院提出控告，並請將潘議泰及潘守仁住宅，執行假扣押。此種無理壓迫手段，實開通商以來未有之惡例。敝會等爲華商前途計，難安緘默。用敢聯名電陳，請求大都迅向日當局提出警告，轉飭該國商人，毋得橫施壓迫，以免糾紛。華商前途，實利賴之。臨電不勝迫切待命之至！

▲中國拒毒會電中央第四次全體會議請議決禁烟

南京中央全會鈞鑒：

連日開議救國大計，薄海同欽，喁望觀成，謹電馳賀。竊以禁煙爲先總理之遺訓，亦民衆所渴念，務請成立議案，責成政府改變寓征於禁政策，爲寓禁於征，並嚴令所屬地方軍政機關實力執行，貫徹國府三年禁絕成案，庶幾鏟除毒害，不託空言。華夏光明，是所攸賴。中華民國拒毒會會長李登輝、總幹事鍾可託叩。魚印。

▲留日湖南同鄉會通電擁護遷都南京

南京國民政府、中央監察執行兩委員會、各報館、各機關、各軍師長、各團體、各學校均鑒：

國民政府爲人民謀福利之最高機關，於茲革命時期，尤須有正確之指導，人民之所以信賴擁護

者，不外其能以全民衆意志爲意志；全民衆福利爲福利，非若少數野心家，政權在握，卽不惜犧牲一切，以求一逞而自棄於民衆者也。孫總理奔走國事，垂四十年，慘澹經營，始有今日。臨終尤以革命尙未成功，同志仍須努力爲囑，幸自義師出發，未五閱月，東南各省，卽次第收復。民衆咸歡欣鼓舞，冀再大舉北上，完成革命事業，而建設一三民主義之新興中國。詎料師次滬上，在武漢之少數共產份子，不依民意之從違，不察時勢之需要，倒行逆施，對於革命事業，多方阻礙；對於社會秩序，多方破壞；對於農工階級，多方愚弄，致全國所期望而行將完成之革命事功，幾瀕於危。惶恐之餘，實深憤慨。茲讀國民政府巧日通電，始悉代表我民衆求福利之最高領導機關，已驅除少數共產分子，遷都南京矣。本會除竭誠擁護外，特此致賀。務祈順時勢之要求，依民衆之意志，於最短期間內，完成國民革命，以慰孫總理在天之靈，以副全國民翹首之望。國家前途，實利賴之。留日湖南同鄉會叩東。

▲上海民衆討唐討奉大會電馮閻兩總司令請卽努力北伐以完成革命大業

歸德馮總司令 太原閻總司令均鑒：

自國民政府出師北伐以來，一戰而撲滅吳佩孚，再戰而打倒孫傳芳，期年以來，所向克捷，國內軍

閱，掃除泰半。不謂禍生肘腋，變起倉卒，共產黨譁張爲幻，搗亂後方。於是本黨不得不先靖內奸，稍稽討伐。乃奉魯殘餘軍閥，怙惡不悛，尙復勾結帝國主義，肆其陰謀，盤據擾亂，逞虐以毒民衆，負隅以阻統一，種種罪惡，罄竹難書。爰於本月六日，召集全市民衆大會，除電請各將領一致聲討唐逆生智，以安反側外，吾二總司令爲北方柱石，黨國干城，敬請努力北伐，滅此朝食，以竟總理之遺志，而完革命之大業。本會謹竭精誠，願爲後盾。上海民衆討唐討奉大會叩魚。

【民衆公電】

▲定海縣民衆電各軍警機關請求保護漁汛

甯台、溫防守司令官、外海水警廳長、定海縣長、警備隊管帶鈞鑒：

本屆漁汛已到吃緊之時，岱山、東沙角、新道頭、念母香等處，外來各幫漁船，已達數千艘之多，人口驟增五萬。五方雜處，良莠不齊，動滋事端。海盜土匪，更多滯跡其間，危機四伏，一觸即發。乃竟水無兵艦，陸無防軍，就地居民，驚惶萬狀，通宵達旦，不敢就枕。此誠吾岱危急存亡之秋也。溯自前清以來，每屆岱山漁汛之際，文武長官，水陸軍警，莫不先期而至，彈壓嚴防，以安閭閻。今時間迫促，迭次請求，尙未蒙縣長暨警備隊管帶蒞臨，閭閻民商，實深惶惑。茲特電請各官長，務乞俯念地方爲重，民意爲歸，

迅賜會同水陸軍警，剋期到岱，以資彈壓，而維治安。戴德無涯，定海縣屬岱山各界民衆叩。寒。

康健衛生寶鑑

指示衛生的方法和種種要點
關於衛生的問題均充分解答

根據科學方法 注重實際情形
說解不厭周詳 文詞淺顯明白

各個人 各家庭 各學校 各團體

所不可少的日常重要用書！

事前——預防 臨事——檢閱 事後——救濟

常備一部 永保健康

普益書局最新出版

世界書局發行

個人衛生寶鑑

定價五角 另售八折

家庭衛生寶鑑

定價七角 另售八折

學校衛生寶鑑

定價七角 另售八折

公眾衛生寶鑑

定價七角 另售八折

全四部 各種一冊
全定價 二元五角

中華民國十八年三月初版
 新式標點
 新公文程式大全（全六冊）

『每部定價銀一元二角』

（外埠酌加郵費函致）



編輯者 朱劍芒

印刷者 世界書局

發行者 世界書局

印刷所 上海大連路
 世界書局

總發行所 上海四馬路中市
 世界書局

分發行所

遼寧 北平 天津 太原 濟南 重慶
 漢口 長沙 衡州 南昌 蕪湖 徐州
 南京 無錫 杭州 溫州 蘭谿
 福州 廈門 汕頭 廣州 梧州

世界書局

